

四明叢書

張宗祥

明明子論語集解義疏卷十二

清定海胡寅伯寅撰

顏淵第十二

釋文凡二十四章朱注同陸氏又云或分子路無宿諾爲別章

顏淵問仁子曰克己復禮爲仁

注馬曰克己約身也孔曰復反也身能反禮則

爲仁矣

皇本克作剋孟子萬章上篇章句引作問爲仁

正義曰左傳昭公十二年冬楚子次于乾谿右尹子

革對曰昔穆王欲肆其心周行天下將皆必有車轍

馬迹焉祭公謀父作祈招之詩以止王心王是以獲

沒於祇宮其詩曰祈招之愔愔式昭德音思我王度
式如玉式如金形民之力而無醉飽之心王揖而入
饋不食寢不寐數日不能自克以及於難仲尼曰古
也有志克己復禮仁也信善哉楚靈王若能如是豈
其辱於乾谿杜注克勝也孔疏引劉炫云克訓勝也
己謂身也有嗜慾當以禮義齊之嗜慾與禮義交戰
使禮義勝其嗜慾身得歸復於禮如是乃爲仁也復
反也言情爲嗜慾所逼已離禮而更歸復之謂身能
勝去嗜慾反復於禮也尸子云閔子騫肥子貢曰何

肥也子騫曰吾出見美車馬則欲之入聞先生之言則又欲之兩心相與戰今先生之言勝故肥韓非子云子夏見曾子曾子曰何肥也對曰戰勝故肥也吾人見先王之義則榮之出見富貴之樂又榮之兩者戰於胸中未知勝負故懼今先王之義勝故肥是以志之難也不在勝人在自勝也故曰自勝之謂強劉光伯戰勝之說實本於二子卽太公丹書敬勝吉怠勝滅義勝從欲勝凶之宗旨也說文克肩也爾雅釋言克能也太元中注克堪也肩能任物卽力堪勝任

本一義之引申故書洪範剛克柔克馬注詩小宛飲
酒溫克毛傳禮器我戰則克鄭注克皆訓勝然法言
問神篇云勝己之私之謂克是以勝私爲克而非以
克己爲勝私蓋克可以訓勝而已不可以訓私也朱
子本劉說徑以克己爲勝私且卽以己爲私欲則與
下節己字歧異矣皇疏本克作剋引范甯云克責也
復禮謂責克己失禮也非仁者則不能責己復禮故
能自責己復禮則爲仁矣剋乃勉之俗字與克本相
通故爾雅釋詁剋亦訓勝字林剋亦訓能說文勉尤

勳也釋名克刻也刻物有定處人所克念有常心也是卽書所謂克念作聖罔念作狂有深自克責刻苦自修之意毛大可引春秋莊公八年經書師還杜預以爲善公克己復禮後漢元和五年平望侯劉毅上書云克己引愆陳仲弓誨盜云宜深剋己反善北史稱馮元興卑身克己人無恨者唐韓愈與馮宿書故至此以來克己自下曰引愆反善曰卑身自下皆深自克責之意也黃先生引後漢書臧洪傳去者克己李注自責不責人也三國志魏楊阜傳云克己內訟

聖人所記公孫瓚傳注引袁紹書云曾不尋討禍源
克心罪已吳諸葛恪傳云士大夫如許子將輩所以
更相謗訕或至於禍惟坐克己不能盡如禮而責人
專以正義諸書所言克己意正相同如此則下言天
下歸仁言由己不由人語意一貫揚子雲謂勝己之
私之謂克是以克爲勝私非卽訓己爲私且以克己
訓責己而去私之意亦在其中矣蒙案克己之訓劉
氏之勝私不如范氏之責己范氏之責己尤不如馬
氏之約身約身者卽夫子善誘之約我以禮也顏子

之於道高堅前後望之初若登天然自得循循之善
誘始也博我以文博文者誦詩讀書也繼也約我以
禮約禮者卽克己復禮也迨禮旣復而卓爾如有所
立則立於禮者自然依於仁矣然則顏子問爲仁而
夫子告之以復禮者何也曰仁義禮智信人之五性
也博愛之謂仁行仁而宜之之謂義合仁與義而秩
然有序大中至正者謂之禮中庸曰修身以道修道
以仁仁者人也親親爲大義者宜也尊賢爲大親親
之殺尊賢之等禮所生也孟子曰仁之實事親是也

義之實從兄是也禮之實節文斯二者是也是禮生於仁義而還須復禮以全仁此經之克己卽書禮記之節性此經之復禮卽詩左傳之定命白虎通義曰智者知也所以知此禮也卽大學之致知中庸之明善也信者誠也所以行此禮也卽大學之誠意中庸之誠身也是五性之交相爲用猶五色之相會五味之相和五聲之旋相爲宮故先王之制禮必本於仁義而吾儒之爲仁卽課之以復禮也凌氏廷堪復禮論上篇曰夫人之所受於天者性也性之所固有者

善也所以復其善者學也所以貫其學者禮也是故
聖人之道一禮而已矣孟子曰契爲司徒教以人倫
父子有親君臣有義夫婦有別長幼有序朋友有信
此五者皆吾性之所固有者也聖人知其然也因父
子之道而制爲士冠之禮因君臣之道而制爲聘覲
之禮因夫婦之道而制爲士昏之禮因長幼之道而
制爲鄉飲酒之禮因朋友之道而制爲士相見之禮
自天子以至於庶人少而習焉長而安焉禮之外別
無所謂學也夫性具於生初而情則緣性而有者也

性本至中而情則不能無過不及之偏非禮以節之則何以復其性焉父子當親也君臣當義也夫婦當別也長幼當序也朋友當信也五者根於性者也所謂人倫也而其所以親之義之別之序之信之則必由乎情以達焉者也非禮以節之則過者或溢於情而不及者則漠焉遇之故曰喜怒哀樂之未發謂之中發而皆中節謂之和其中節也非自能中節也必有禮以節之故曰非禮何以復其性焉蓋性至隱也而禮則見焉者也性至微也而禮則顯焉者也故曰

莫見乎隱莫顯乎微故君子慎其獨也三代盛王之
時上以禮爲教也下以禮爲學也君子學士冠之禮
自三加以至於受醴而父子之親油然而矣學聘覲之
禮自受玉以至於親勞而君臣之義秩然矣學士昏
之禮自親迎以至於徹饌而夫婦之別判然矣學鄉
飲酒之禮自始獻以至於無算爵而長幼之序井然
矣學士相見之禮自初見執贄以至於旣見還贄而
朋友之信昭然矣蓋至天下無一人不囿於禮無一
事不依於禮循循焉日以復其性於禮而不自知也

劉康公曰民受天地之中以生所謂命也是以有動
作禮義威儀之則以定命也故曰天命之謂性率性
之謂道修道之爲教夫其所謂教者禮也卽父子有
親君臣有義夫婦有別長幼有序朋友有信是也故
曰學則三代共之皆所以明人倫也復禮論中篇記
曰仁者人也親親爲大義者宜也尊賢爲大親親之
殺尊賢之等禮所生也此仁與義不易之解也又曰
君臣也父子也夫婦也昆弟也朋友之交也五者天
下之達道也知仁勇三者天下之達德也此道與德

不易之解也不必舍此而別求新說也夫人之所以爲人者仁而已矣凡天屬之親則親之從其本也故曰仁者人也親親爲大亦有非天屬之親而其人爲賢者則尊之從其宜也故曰義者宜也尊賢爲大以喪服之制論之昆弟親也從父昆弟則次之從祖昆弟又次之故昆弟之服則疏衰裳齊期從父昆弟之服則大功布衰裳九月從祖昆弟之服則小功布衰裳五月所謂親親之殺也以鄉飲酒之制論之其賓賢也其介則次之其眾賓又次之故獻賓則分階其

俎用肩獻介則共階其俎用肫胎獻眾賓則其長升受有薦而無俎所謂尊賢之等也皆聖人所制之禮也故曰親親之殺尊賢之等禮所生也親親之殺仁中之義也尊賢之等義中之義也是故義因仁而後生禮因義而後生故曰君子義以爲質禮以行之孫以出之信以成之禮運曰禮也者義之實也協諸義而協則禮雖先王未之有可以義起也郊特牲曰父子親然後義生義生然後禮作董子曰漸民以仁摩民以義節民以禮然則禮也者所以制仁義之中也

故至親可以撝義而大義亦可以滅親後儒不知往
往於仁外求義而復於義外求禮是不識仁且不識
義矣烏覩先王制禮之大原哉凌氏精於禮經於仁
義禮相關之大原言之透鑿惟下篇似爲稍遜而其
好惡說實克己復禮之要旨也故皆節錄之說曰好
惡者先王制禮之大原也人之性受於天目能視則
爲色耳能聽則爲聲口能食則爲味而好惡實基於
此節其大過不及則復於性矣大學言好惡中庸申
之以喜怒哀樂蓋好極則生喜又極則爲樂惡極則

生怒又極則爲哀過則佚於情反則失其性矣先王制禮以節之懼民之失其性也然則性者好惡二端而已矣大學言誠意正心脩身齊家治國平天下皆在好惡而終於好人之所惡惡人之所好是謂拂人之性菑必逮夫身然則人性初不外乎好惡也故正心之忿懣恐懼好樂憂患齊家之親愛賤惡畏敬哀矜敖惰皆不離乎人情卽好惡也好惡生於聲色與味爲先王制禮節性之大原此其故子產言之備矣左傳昭公二十五年子太叔對趙簡子曰吉也聞諸